

- DAE. Tanto illi melius optigit qui perdidit :
Tuom esse nihilo magis oportet uidulum.
- GR. Isto tu's pauper, quom nimis sancte piu's.
- DAE. O Gripe Gripe, in aetate hominum plurumae
Fiunt transennae, ubi decipiuntur dolis. 1236
Atque edepol in eas plerumque esca inponitur :
Quam siquis auidus poscit escam auariter,
Decipitur in transenna auaritia sua.
Ille qui consulte, docte atque astute cauet, 1240
Diutine uti bene licet partum bene.
Mī istaec uidetur praeda praedatum irier,
Ut cum maiore dote abeat quam aduenerit.
Egone ut quod ad me adlatum esse alienum sciam
Celem ? minime istuc faciet noster Daemones. 1245
Semper cauere hoc sapientis aequissimumst,
Ne conscii sint ipsi malefici suis.
- GR. Spectaui ego pridem comicos ad istum modum
Sapienter dicta dicere atque is plaudier, 1250
Quom illos sapientis mores monstrabant poplo.
Sed quom inde suam quisque ibant diuorsi domum,
Nullus erat illo pacto ut illi iusserant.
- DAE. Abi intro, nam molestus : linguae tempera.
Ego tibi daturus nil sum, ne tu frustra sis. 1255
- GR. At ego deos quaeso, ut quidquid in illo uidulost,
Si aurum, si argentumst, omne id ut fiat cinis.
- DAE. Illuc est quod nos nequam seruis utimur.
Nam illic servos si cum iniquo congressus foret,
Et ipsum sese et illum furti astringeret, 1260
Dum praedam habere se censeret, interim
Praeda ipsus esset : praeda praedam duceret.
Nunc hinc intro ibo et sacrificabo : postibi
Iubebo nobis cenam continuo coqui.
- CANTOR. Nunc, spectatores, bene valet et plaudite.